

魏

叔

子

日

錄

目錄序

古人致道以及人厥事惟三立
言視功德爲虛位然最足經久
獨六經孔孟諸書能者取制科
拙者守章句又或綺麗以爲工
放詭以爲才求其坊言而表行

者寡矣古人立言之義蓋無取
焉言雖工余每廢書而歎也康
熙壬子秋于西城里見寧都魏
叔子先生其人粹然圭璧也讀
其文瑩然冰雪也交甚合出其
日錄三卷示余余受而卒業以

淺言出妙義以至理入人情別
是非示從違昭昭然白黑之在
目其引人于理義如飲江河隨
量而滿如行藥市隨病而療有
功於世道人心更有在諸儒先
語錄之外者卽以輔翼六經孔

孟諸書何媿焉余喜而抄錄弗
敢私以獨善乃付剞氏公諸天
下後世仍歸其板附先生之集
云吳門同學弟默齋唐景宋題

目錄序

聖賢之道德豪傑之事功其源流或有不同要未有
外於人情事勢者蓋闇於人情則真偽亂昧於事勢
則成敗失是道德爲虛名而功業不可就也曰彼聖
賢彼豪傑天下亦何賴有是人哉然人情事勢欲求
其通之也甚難心不細則粗疎而不入心不平則作
奸作惡偏激而失其分閱歷不久則得一失一恆疑
似而不真吾友魏叔子從事於斯久矣其忠厚惻怛
出於天性而加以學問與父兄師友講求於前能

之際者數十年於是卽其所得著日錄三篇蓋坐可
言起而可行自身家以及天下皆實有所裨益雖不
敢曰道德功業盡在於是固亦聖賢豪傑之荃蹄也
矣其書於心性大本未遑及亦不無好盡之過而以
啟蒙訂頑誠有前賢所未逮者予酷好之日置几案
饑則以之代五穀病則以之代藥有痛癢則以代撫
摩抑搔蓋不能以一日離也叔子之文爲海內所推
奉其論策鑒鑒識者以爲賈長沙李忠定流亞此皆
叔子江海之水波瀾涵洞魚龍變化而日錄乃其昆

混之泉源也嗚呼不讀是書亦孰知其本也哉南豐
友兄程山謝文濟序

目錄引

余幼承父兄之教有日長而師友誨之有日早涉世
事讀古人嘉言懿行有日見之聞之疊疊然有得於
心則言之已而錄之是日日錄或以自志警或詔諸
門人子弟不諱其不文取易通也意所偶至或文言
之體雜不相附一日裏言二日雜說三日史論

魏叔子目錄

第一卷

裏言

第二卷

雜說

第三卷

史論

魏叔子日錄卷之一

目錄一編

寧都魏禧冰叔著 吳門唐景宋邗若較

裏言

事後論人。局外論人是學者大病。事後論人每將知人說得極愚。局外論人每將難事說得極易。二者皆從不忠不恕生出。

丘邦士曰：事後局外極好論人，事後則其人之首尾盡露，局外則其人之四面俱見也。但須替他設身從事，裏局中想耳。

人骨肉中有一慳吝至極人我寧過於施濟有一殘
忍至極人我寧過於仁慈有一險詐至極人我寧過
於坦率有一疎畧至極人我寧過於周密有一煩瑣
至極人我寧過於簡易有一貪淫至極人我寧過於
廉正有一放肆至極人我寧過於謹慎有一浮躁輕
薄至極人我寧過於謙厚正須矯枉過正乃爲得中
如此方能全身遠禍并可解此人於厄

丘邦士曰須如此立意做耳若論應事又或有其
人不好處我亦姑如此又不致形出其人之短又
其至者更能推幾多施濟仁慈之事於此人
與他慳吝殘忍等相准過不至大受禍耳

彭躬菴曰矯枉處正是中如此看中字方透方有
用然此等事惟內本至誠外無形跡乃能人已無
弊否則操以暴吾以仁田單之愛人
乃王之教鮮不入英雄作用中去矣

人子事父母當其喜有歡欣無偷肆當其怒有恐懼
無憤憾此當內正其心志而并外慎乎形色也

論小人者必論其心小人庸多善事其心未有無所
爲而爲者若徒論外事人品真僞學術邪正幾不可
辨矣論君子者又不當徒論其心心雖純正而行事
偶失亦卽是過故論小人以心者所以防閑小人之
法論君子以事者所以造就君子之方

輕信人不必多疑而多疑人每易輕信蓋輕信者自信其信多疑者亦自信其疑故其不用疑時遂爾輕信無他然輕信者能爲君子所托亦易爲小人所欺而多疑者每過用疑於君子忽輕用信於小人矣

丘邦士曰過疑君子不肯以君子待人也輕信小人君子不求合於能疑之人小人知其能疑而有以用之也

弟和公曰多疑之人苛愚而易欺故輕信也其性信虛不信實

術字亦有不可少處但不得已而用專意利人而用謂之聖賢可不必用而用專意利己而用謂之奸雄

讀古人書與賢人交遊最不可苟爲同。又不可苟爲異。二者之失。總是胸無定力。學問中便有時勢趨附。非諂卽矯耳。

丘邦士曰。是極公極確極細。心語。然又恐從定力中生出病痛。

人極重一恥字。卽盜賊倡優。若有些恥意。在便可教化。若其人雖未大惡。或遇羞恥之事。恬然可安。肆然不畏。則終身必無向善之日。推到極不善事。亦所肯爲。恥字是學人喉關。聖人教人。與小人轉爲君子。皆從恥上導引。激發過去。人一無恥。便如病者閉喉。雖

有神丹不得入腹矣

彭躬卷曰恬然可安肆然不畏畫出一個無恥人模樣卽此便是大惡

嘲戲人自是惡事尤不可入一二莊語則戲者皆真
每令人恨若規人過失不可入一二戲語人戲語則
真者皆戲每令人玩失規人之旨矣

伯子曰凡有可恨之實人復難加以可恨之名則其恨必淺蓋旣恨其可恨者而其恨我而不能加之意則尤憤結而不可名言也故嘲入莊語尤爲不可

人交遊當求十分至友若不至十分到極要緊處便
用不著又如其人舉動狂悖極力挽回不得只得棄

去若已至十分真如天性骨肉則不至目瞑氣絕心中畢竟曲思挽回希倖萬一可救然十分關切却從十分相信來若有一分未信積嫌開隙便會到十分相疑故交友者識人不可不真疑心不可不去小嫌不可不畧

丘而康曰此叔子
於人已極得力處

擇師取友方能遷善改過然無師友可倚恃將如之何故凡交友必要交倚恃得者凡做人必要做能爲人倚恃及終身可不倚恃人者

李于曰此亦推到極處見人不可不自立耳若終身不倚恃人千古無此事

人於橫逆來時憤怒如火忽一思及自己原有不是不覺怒情燥氣渙然冰消乃知自反二字真是省事養氣討便宜求快樂最上法門切莫認作道學家虛籠頭語看過

聖人動輒稱說禍福不單是勸戒後人如此要見得聖人畏天畏民一段兢兢業業精神又見得聖人呼吸動靜與天爲通一段微妙與計功謀利及慕而爲善懲而不爲惡者自判霄壤

小人之一陷不可救。君子與有過焉。凡小人之心。初亦樂附君子。君子棄之已甚。彼進既不得。附君子退必力結小人。此招彼附。勢不可解。向自附君子。尚知畏敬。及見棄時。視君子便如異物。稍稍責備。決裂放肆。成一狠敵。故處小人不可輕絕。我之言語時或聽信。否則此人自在小人中生活。終身不得聞一好言。見一好事矣。

丘邦士曰。須看是何等小人。亦有當絕之者。

謝約齋曰。并要看自己身分。
凡正叔曰。不止於全君子。而兼欲救小人。論旨最厚。最大。然得則爲陳太丘。失則爲康對山矣。

彭躬菴曰必絕介庸韓歐司馬老矣不復博學荒
忠直之失總是義理情勢未十分精透耳如程明
道王文成之處小人橫逆便自無繫

彭躬菴曰人胸中嘗要存不媿吾友四字若說恐其
知而見責便落二義余最喜誦斯語吾師楊一水先
生過於信人予嘗語門人曰生平被先生信怕了所
謂受絹媿於受杖

謂門人曰少年人最要忍得口頭鋒住與人相譏罵
時尤要著意蓋人情原喜相勝回他言語定思駕過
此人却難當此便與攻發人之陰私一般故凡罵

語謔語須有分寸不但中怨恨亦是自處忠厚之道。

丘而康曰道其人實事便同攻發陰私若思駕過恐至捏造毀謗巧言如實矣豈惟自失忠厚且自陷於大惡而不顧所謂始乎陽卒乎陰也

余生平未嘗遭險受橫逆十七歲時曾於席上以訛傳道人陰事不知此人卽在對坐予當下驚慙欲死而此人並不相仇且成文章知己終身遂爲此友所容余告止山曰平日謹言一放肆便刺手可見天地愛我然此人終不相仇轉會心粗手滑恐又是棄我

之意。每思少病人一病便重。願諸君時賜提醒也。

謂門人曰：人如何謂之立志？且莫說學某聖某賢。凡人必有所爲，必有所不爲，先要辨得何等好事，是我斷做得的，是我必做的，何等不好事，是我不會做的，是我斷不肯做的。

謂門人曰：汝於我言行心中，不然處便須直說。必有一人受益，如汝說得是，則汝益了我，說得不是，則我又益了汝。

伯子曰：天下惟四高人，極難受益。年高位高，識高，學高，年高位高者，難受益於常人；識高，學高者，并

難受益於君子。蓋地步既高。又復自高。只思益人。豈思人益卑者。何人豈敢益我。故受益學問。不但卑益。心志并當謙退於詞色之間。

人孰無過。只要所過。是朋友面罵得的。不可是朋友背地方說得的。蓋當面可罵過。雖大畢竟屬光明。那邊背地方說過。雖小畢竟屬曖昧。那邊。

朋友除傷倫敗化外。寧可十分責他。不可一分薄他。我有薄他之意。則誠意已衰。雖有正言。不能感人。且易招怨。

遇疾惡太嚴之人。不可輕易在他前道人短處。此便。

是燒油入火其害與助惡一般

李子曰此是善全疾惡人一種苦心妙用勿僅作厚道看過

妻之罪不至可出子之罪不至可殺齊家者便要十分調理訓化剛斷則傷恩優容則害義故豫教之方不可不謹於早也

料事者先料人若不知其人才智高下只在事上土料雖情勢極確究竟不中故能料愚者不能料知能料知者并不能料愚余嘗笑三國演義孔明於空城中焚香掃地司馬懿疑之而退若遇今日山賊直入

城門捉將孔明去矣

做大事人要三資具備曰識曰力曰才無識不足料
變無力不足持久無才不足御勢或曰子億而多中
可謂識乎曰凡利害是非晝然處不難辨難在兩端
俱是處辨得出且所謂億而中者費幾許躊躇若利
害爭呼吸間安能得耶故識字尤是第一緊要或曰
識可造乎曰可造識之道有三曰見聞曰揣摩曰閱
歷見聞者讀古人書聽老成人語及博聞四方之故
是也譬如剪花花樣多剪得快譬如醫藥藥方多醫

得穩揣摩者無是事不妨作未然之想事已往不妨作更端之慮在已者擬而後言議而後動是也在人者不徇古今是非利害之迹必實推求其所以然使洞然於前後中邊之理或事已是而有更是有未盡是有竟非是者或事已非而有更非有未盡非有竟非非者是也閱歷者所謂局外之人不知局內之事局內之人不知局中之情是也天下事變不特無常法可守并有非常理可推故見聞揣摩之功五閱歷之功十

施恩之道有二。一曰施恩使已可繼。常人喜於見恩。盡情施去。不計後日。不給恩。衰成怨者。有之。然不可執。可繼一語。做成出內之客。如果大處急處。不求可繼。可也。一曰施恩使人可勸。常人輕於用恩。或多寡不中節。或緩急不中時。或輕重不中人故。財竭而人不蒙利。賞數而人不見榮。然不可因可勸一語。做成好行小慧。或抑人以揚已。或巧施以望報。則人心不平。天道亦忌之矣。

謂門人曰。人極難知。一人之身。卽有不同。舉一二事。

有似極忠厚舉一二事又似極權譎此當何以辨之
總要先識得此人是君子是小人乃可進論其曲折
也

丘邦士曰世無執一盡概其餘之事辨君子小人
一語特近之耳然英雄相遇雖小事足概生平此
極有至理却無理可說

觀人行事須在大處觀人立心須在小處人大節無
虧小失不足復論而欺世盜名之人每於輕易忽畧
處露出全付心術合而察之人無遁情矣

唐邢若日爲善有以有心貴者強恕而行是也有
以無心貴者善不近名是也然露出處便是小人

一時天則亦是天下人福利也
伯子曰此便是視以觀由察安下手處

朋友中有性多猜忌者此非可以辨說解也在積誠
以感之有性多堅僻者此非可以諫諍入也在脩身
以示之故朋友有隱過非我所敢言也或借事以自
責或援事以責人或取他人之過類是者而反覆疵
議之或取他人之善反是者而再三稱說之陰移人
於性情之間而人不以為吾是此責善之上術也
季子曰須看左鑽右研委曲耐煩處是用心極厚
說到不以爲吾是幾於善世不伐矣推斯道也爲
格心之大臣可也

聽奸言語無津津有味之意便是不曾立志

毋毀衆人之名以成一己之善毋役天下之理以護一己之過

人作便宜事順意無礙便愁禍來若一做吃虧就是天地愛我蓋我原薄福又丁斯世便宜之事如何消受得起

伯子曰積勞可以當病積懼可以當災積勤謹可以當智謀能常憂者無恆亡能守約者無真貧能守挫者無終敗石公曰處大順之中日見樂不見不樂吾惕然處衆人之中見已長惟見人之短吾惕然

人遇親友患難卽不能爲力。要當於己身畧一虧損。我若完全安坐。不但過心。不去天道人情。必竟有不平處。凡直世亂國變兵荒疾疫之時。隨人隨事皆宜如此。不特在親友間也。

人有一種改不得過遷不得善進言者。便不可執責。或疑。毀者不可不知。

善常理強說如居喪當哀。有不哀者。本當責備。不知此人性情原自不及。不能以吾言而哀。吾言之而彼不能哀。則其人無以自容矣。故爲友者。須於平時察其不及處。說以義理。漸其性情。使之自化而後可也。

人最不可輕易疑人。今如悞打罵人。人可回手回口。若悞疑人。則此人一舉一動。我有十分揣摩。他無一毫警覺。終身冤誣。那得申時。此逆億所以爲薄道也。

伯子曰。待至誠之人。當至誠待。誦詐之人。尤當至誠。蓋誦詐之人。病在不誠。我以至誠待之。正是彼之對藥。漸積漸久。其病必廖。若我以爲其人未可誠動。偶參一分誦詐。彼原以誦逆人者見我。一分必復加倍。我見彼。加而我益加。彼見我加。而彼又加。彼此相加。無窮已。是不惟不得動彼。以誠并且有以陷我於詐也。夫如是。而日彼人非我族類。以我感之。猶有不通。豈不謬哉。

語曰。濟人須濟急。言事半而功倍也。然又須於我閒時用之。每見富貴人。偃然驕客。及身當困急。始降禮。

輕財以要結人人亦偃然受之雖百分不及閒時一分矣

謝約齋曰施濟如有要結心便在閒時亦非聖賢之仁

人做事極不可迂滯不可反覆不可煩碎代人做事又極要耐得迂滯耐得反覆耐得煩碎

立邦士曰中間一句君子尤當耐

觀人於患難局中者不可不開局外者不可不忙局中之閒所以觀學問局外之忙所以觀性情

人天資各有一種好處但天資好處是天所與如子

孫席祖父富貴不是自己力量所能畢竟要從學問中力行來方算得手

語曰樂道人之善樂道中亦有過處不可不察今有一事可嘉譽之過當中人之資承當不起必至心滿意驕逐步墮落昔有士人既貴語人曰如我想可不至改節其人曰公固賢者但恐被人敬癡耳敬人而使癡可謂不善用其敬矣

曾止山曰信州敬癡著實可味

或謂子於言語之道庶幾乎曰詞氣不和平此大患

也常細求和平工夫。却不在詞氣上。須要心中不急。不憤。不自是。不好上。

立而康曰。具此四不。則有三可。曰可以進言。可以聽言。可使與賓客言。

人有肯受善者。畢竟要到曲直分明。屈於直而後服。非真虛也。每見一水夫子聽言。雖童子賤役一開口時。便敬而聽之。虛而能敬。此聖賢之用心也。

丘邦士曰。亦有先敬而未虛者。又不可不知。然畢竟尚不是敬。敬則無不虛。須敬而未虛者。勤取。

杜譏消釋之道。無過精察。今有謗人者。曰某人罵汝。其人曰。我罵我不真也。此人并精察。俱不用。可謂淺。

度長者矣。不知此等學問。稍不及大聖賢。廓然大公。胸中畢竟未能全化。謔言來時。一次不怒。五六次便怒。五六次不怒。十次便怒矣。嘗有忍至九次。其後一次不忍。從前憤怒一齊發出。決裂狠斷。十倍常人者。若能每事精察真假。如果真也。則當日逆來順受。何所不容。或自反曰。我自處原有不是。如其假也。則既見此人之謔。使小人不能復行其說。又可辨彼人之誣。不至枉人於冥冥之中。斷無有積疑成釁。一發莫禦者矣。

、丘邦士曰聞謫時第一當用不信的心總見得非我親見親聞我無從信處則此中疑根已斷了若到有縱罵我三字在心便當用後順受自反二法此蓋處人我治性情省事養心之法若移下一等人說恐有積疑成彘之患則精察中亦反有弄假成真之時矣

古今教人做好人只十四字簡妙直切曰君子落得爲君子小人枉費做小人蓋富貴貧賤自有一定命數做君子不會少了分內做小人不會多了分外落得者猶云拾得言極其便宜也枉費者猶云折本言極其吃虧也

古人教人聽言莫精捷於伊尹二十一字曰有言逆

于汝心必求諸道有言孫于汝志必求諸非道凡人
逆心時便覺非道我却先從他是道處求則其道出
矣凡人孫志時便覺是道我却先從非道處求則其
非道出矣今人逆心便從非道處求孫志便從是道
處安求得不好諛護過小人日親君子日遠乎

人不服善有兩種如彼言是此未大非再三爭辨謂
之識見不及工夫全在造識如是非較然可見再三
爭辨是不思也若能降心細思則自明矣又曰兩相
爭執各不肯服惟當退而深思就正有道或僉謀博

詢之則是者自出不可持一往之氣騁一時之辨以
爭勝負於立談費時日耗神氣甚而傷雅道也

施恩之人有始而鮮終受恩之人忘恩而記怨二者
皆常情也君子不可不戒

或謂賢士忘人勢比賢主忘勢更難曰不然我輩做
秀才行止坐臥便覺不是白丁羅一峯所謂學問十
年尚淘洗狀元二字不去也若真能忘勢人定能忘
人之勢大抵忘勢工夫全在好善賢王只見天地間
有善可好此外別無可好處故不覺把勢忘了忘人

勢工夫全在樂道。賢士只見天地間有道可樂。此外別無可樂處。故不覺把人勢亦忘了。我輩不能忘人勢。自是不能樂道。他日富貴。必不能忘勢矣。

朋友不能規過。或所見未及。或性情不懇篤。或無犯顏敢諫之氣。然三者首在性情。性情肫切。則識自無所不入。力自無所不出。夫朋友有過。吾苟聞之。如負芒刺於背。如人罵已姓名。夜有所得。則汲汲然不能待諸旦也。

天地生機。聖賢道理。二者極是兩間不滯之物。刻刻

流行亦處處圓通。知生機之不滯。可以求仁矣。仁者無不愛也。知道理之不滯。可以學智矣。智者無不知也。

當事來要辨得是非利害四字。是非有時朦朧。須要一個透。利害最難逆料。且辨一個穩。然我輩立身利害。要看得輕。是非要看得重。又曰利害之權在天。是非之柄在己。利害是或然的。是非是畫然的。利害不明。累在一時。是非不明。累在萬世。又曰辨是非利害。又要識得大小輕重緩急六字。否則不成。畏利害小。

人便成就是非迂儒又曰君子持節如女子守身一失便不可贖出處依附之間有公。有私。有間。二。字。更。不。可。不。慎。當至慎

人不可不讀史未讀時覺自己儘高七尺之軀昂然獨上及見前代人物忽不覺矮矮極了大地雖寬竟無站足之地

君子使人可愛寧使人可敬愛必有其狎之敬必有其疑之狎生厭厭生賤疑生忌忌生惡與其厭而賤也寧忌而惡夫愛而不敬者愛終衰因敬生愛愛不窮矣是故小人無敬小人而人敬之必外附君子之

重。

李咸齋曰此亦矯枉之言。少年輩宜日誦成德人又自不同。

人有薄其父母兄弟而厚他人者。莫不曰此喪心狂惑人也。然此等亦是人情之蔽。蓋父母兄弟我雖極情。不過尋常道理。父母兄弟不見可感。旁人不見可誇。若厚在他人。則受者感動詞色。而人且以美名歸之。是以薄所厚而厚所薄也。澄源察本。雖賢者亦不免矣。

聞之先輩曰。作功德事。不要只說損已。須要看人實。

受益否不然勞費千萬究竟虛設予謂此種不是好名便是懶惰究言之只是不關切今人謀身家計子孫者豈有此

予少時嚴於疾惡見凶惡小人必思驅除雖怨尤叢身自信理當如此不知除殘去暴在得志乘權人便當任爲已事若伏處貧賤快逞里閭終是少年喜事之習未除

患難危亂時處賤役輩極須得體恩意不妨過周詞色不可過降恩意不周則彼有畔心詞色過降彼

將陰窺吾怯。代以搖制其命。不然亦驕悍難使矣。
人能無故學吃虧。無故習勞苦。無故澹嗜欲。皆是求
福弭災之道。

或問子於財客乎。曰不客於害義之事。而客於不害
義事。或無客事。而有客心。無客心。而有客情。此孔子
所嘆爲鄙夫也。

與僕役工作人處。宜降體和氣。引之言話。有三大益。
縱其所言。使下情得以上達。而我亦可知里巷好惡。
及一切土俗利害。物價貴賤。一也。言語往復。得舒其

情使之樂於從我。雖勞不苦。雖苦不怨。一也。話言間。或論天理王法。或說善惡報應。隨事廣辟。亦可使其遷善改過。救補萬一。三也。

彭躬菴曰。趙廣漢李允則周文襄俱用此法。第三段尤不可及。

謝約齋曰。若居人上。亦須以明爲主。倘一不察。則正人遂有市重之意。或遂爲其所用。其弊亦在於此。

人以涉世爲涉世。故委曲周旋。輒生厭苦。不知涉世處。卽是自己做學問處。今如涉世要周詳。學問中原不可疎畧。要謹慎。學問中原不可放肆。要謙和。學問

中原不可疎。傲若能體認。涉世便是學問。則自不見世情可厭惡處。而我日在委曲周旋中。亦不覺煩勞矣。

謝約齋曰。君子以爲學爲主。要在治心。而涉世亦在其中。倘以涉世爲主。則便做成鄉愿。分別只在此處。

或問子如何便是能裕。曰。若人將生平著述當面焚却。胸中無一毫懊恨顧惜。便是真裕。

謝約齋曰。須知子淵無一著述。而爲百世師。黃叔度無一著述。而人以顏子擬之。則亦不必懊恨顧惜矣。

甘健齋曰。此已最難克。然不克到此。終欠力量。

拙○君○子○定○帶○幾○分○巧○巧○小○人○定○露○幾○分○拙○君○子○之○心○
一○一○則○專○專○則○精○精○神○周○到○故○雖○拙○而○巧○小○人○之○心○雜○
雜○則○分○分○則○精○精○神○疎○漏○故○雖○巧○而○拙○

凡○人○皆○不○可○悔○無○用○人○尤○不○可○悔○蓋○無○用○之○人○無○勢○
力○無○才○智○天○至○此○也○窮○了○惟○天○窮○而○無○處○則○天○心○必○
淡○憫○念○他○世○間○千○人○萬○人○遇○著○無○告○之○人○便○惻○然○動○
心○此○便○是○天○心○可○見○處○天○憫○念○他○我○反○欺○侮○他○便○得○
罪○於○天○

石○公○曰○勝○我○者○不○敢○侮○如○我○者○不○必○侮○不○及○我○者○
不○忍○侮○何○所○容○其○侮○抵○自○侮○耳○

楊一水師嘗言邦有道貧且賤焉恥也邦無道富且貴焉恥也兩且字最妙有道而貧或其人拙於貨殖若泯泯無聞一命不及是德業不脩也故貧尚不足恥而貧且賤焉恥也無道而富或其人坐席先業若不識進退希營美官是廉節不殫也故富尚不足恥而富且貴焉恥也此理本確數年來親見一番愈覺有味

處世當務詳慎不可盡與燥脾凡飲食舉動言語筆墨一盡與便放肆一燥脾便刻薄其始無害人之心

而其事必至於害人。初若不至殺身。終至殺身。而有餘也。

或問顏子早夭。是脩德不必蒙福。曰禍福壽夭。有一定命數。爲惡得福。斷非因其爲惡。天故將此福與之。若肯爲善。依舊享福。豈不落得。做了君子爲善得福。斷非因其爲善。天故將此禍與之。設或造惡。依舊蒙禍。豈不枉費。做了小人。子謂顏淵之夭。果因脩德。雖不爲善可也。子謂顏淵之夭。不因脩德。則畢竟脩德更安穩耳。

季子曰脩德造惡禍福自在然君子蒙禍淡人悲悼小人蒙福重人怪憤而其卒亦鮮有不及禍者黃鳥之歌朱方之嘆是已以此較量自有虧贏應嗣寅曰世間夙了多少惡人便不提起今人提起便以顏子爲口實可見世間只仁者壽是常事耳

人情好諛賢者不免蓋常人要人順我逆理不顧賢者雖無此却人稱其好時便欣欣有喜色此便是好諛之根胸中自說不是好諛喜其人志同道合不知此時已入於諛中而不覺矣不常時省察便會到忠言逆耳之時

在室人謂予曰汝做一件好事便喜動辭色何淺也

乃知學問偏隘處婦人女子早已覷破矣因思人情
於他人前便有矜持有粉飾雖父母兄弟在所不免
若妻子婢僕我無忌憚之意而情最狎時最習便有
許多不檢點處人能於此隨事受規亦能補朋友所
不及

天下無不矯情賢者無不近情聖人然不曾矯情未
易便說近情二字

謝約齋曰矯情以去習便是賢者矯情以去舉便是
是偽人近情而合道便是聖人近情以徇俗便是
鄉愿

急求人知總是惡多善少且不要說到好名上去
於財利見常人於患難見豪傑於安樂見聖賢或謂
患難不難於安樂乎曰患難處生不易其操有意氣
者偶能之有志節者優爲之若處安樂易生怠惰怠
惰之久則嗜欲長驕恣出矣每見豪傑不屈於威武
不移於貧賤而不能不淫於富貴固知安樂非聖賢
不能居

丘邦士曰以常情言自是危難於安故孔子曰貧
無怨難富無驕易以有激而言則安難於危故孟
子曰生於憂患死於安樂以天資言則各有所近
故有臨難不屈而處富則淫亦有居龍清苦而遇

難苟免者其他財利女色榮爵功名忍於此不忍於彼可輕生不可去欲者抑又多矣

虛心有二高以自居執已之是兼收他人之是者謂之以已取人所重在已惟恐失人者也卑以自牧舍已之是樂與他人之是者謂之以已從人所重在人惟恐失已者也此便有王霸純雜之分矣

不虛心有二志大而識卓者其心高高則不虛見於上恐忽於下也志密而行切者其心實實則不虛明於近恐蔽於遠也

或問欲自考虛心與否何如曰人有規我屈已聽之

未足言虛其人將規我時畢竟要思進言之方便當
自反非自視太高使人生疑則鋒鋦太露使人生畏
若真正虛心人凡人胸有欲言無所揀擇一味向前
直說然此非有從諫弗咈之學未易語也

學人病痛有與質性好處近似者今如柔美德也性
懦者近柔吾欲克去懦處却疑損了柔德或竟認懦
爲柔照察不精使無從下手處

論事晰理須從相同處分得閒相異處通得合

毋謂已今日已爲君子毋寬已他日祿爲君子則已

必可爲君子矣。毋量人。他日不能爲君子。毋責人。今日卽當爲君子。則人必可爲君子矣。

止而康曰。謂己已爲是僞。徐爲是欺。謂人不能爲是誣。卽當爲是刻。僞與欺爲不忠。誣與刻爲不恕。
人幼時不可令衣絲綺。嘗食肥甘。蓋幼年衣食所費無幾。父母最易嬌養其子。到後長大其費不給。服粗茹淡。遂覺難堪。至養蒙當教澹泊。又不待論。人平日食用不可求精。臥處不可求安。蓋平常無事尚是易爲。若當疾病患難。稍不如意。倍增苦惱。至學問無求安飽。又不待論。

聽人談論於吾所謂是者不可遽爾贊嘆所謂非者不可遽爾辨駁須要仔細體認一番

亡而康曰此博學審問之後所以須慎思而後明辨也叔子從僊犀中指出此兩不可遽爾工夫最切要

禧生平病在姑息因姑息生遷就因遷就生苟且然姑息中有近是道理所以根淺難拔在已處說學問中有漸次意在腳踏實地却便成一個今汝盡在人處說教人有方意在循循善誘却怕成一個教之姑徐徐云爾二者相較處人之道未必盡非却同一個

病根流出來

忠告善道是至誠曲成處。試思我爲何諫友。是本心不能自己。望他真實改過。若念及實要其人聽受。必竟胸中有一番周回詳審。不肯徑情直遂。徒快我所欲言。蓋忠告善道雖是兩層。却不能善道畢竟算忠告。不得此中便夾雜了自己性情習氣。偏僻處在內。然所謂善道者。又非一味委婉法語。異語直諫。諷諫各當其機而已。

丘邪十日所謂感人心而天下和平於此亦見其實用處

謝約齋曰受友諫者當鑒其忠告原其不善道

人伎施有三等最下者矜喜之心形於詞色其次者詞色間極謙虛胸中却終有物子在其上者不伐不施已自做得却便覺我那不伐不施的好處卽此便是伐施。

聽人說事理卽我所已知只當靜聽不可攪口接了去說總是要顯已長妒心名心一并發出耳。

凡人偏有所好及立定一意要人從我二者皆能召諛蓋諛人之術只是投其所好善諛者我好忠義彼

便投以忠義。我奸簡樸。彼便投以簡樸。甚至我奸直諒。彼便正顏厲色。隨事責善。投我以直諒。件件與諛字相反。却件件與諛字神妙比。嗜欲之好。更易惑人。人於諛根上。不十分去得乾淨。鮮不爲所乘者。

謝約齋曰。人肯以直諒加我。則我實受其益。何以爲諛。蓋以其有市心耳。但市心在彼。則不可在我。則感佩之不妨也。

予向喜仁術二字。初謂是理中當有此番委曲。久之。理上多了幾許安排。又久之。理外生出各種詐僞。便把仁字放空。却將術字做了把柄。故日用應事。須十

分兢業常提著履霜堅冰之意

謝約齋曰須是仁字十分淡重術則從中生出方妙倘於術字上著喜則仁字只是附和久之附和者去而術爲主矣

骨肉中亦有以仁術濟事者如大杖則走不告而娶之類但此事既濟心中有个自喜念頭雖出至誠總是僞薄蓋天倫骨肉主於率性自然不得已而行權宜心中當有萬分不敢不忍紆回抑鬱之意若一念自喜是直以用術爲快意也施之途人且不可施於骨肉猶可言哉

人於境遇事物上不可有必得心無必得心則胸中自然安樂寬裕若有必得心則事先有許多希冀疑惑及事不如意不但憂憤難堪恐便枉了學術壞了心術去成就此事

凡人言及害人非理事我雖不與謀若從旁附和一句便自有罪故處此有三道以至誠感悟之上也去其太甚次也漠然不置是非於其間又其次也

彭躬菴曰須知是爲人已寡過不是老世法推開討便宜

立意說謊人亦少多因一時要說得好聽便生出無

數虛誕。自揣言語之間。其不務好聽者鮮矣。

彭躬菴曰。推此一念。令人疑一部廿一史有多少失實處。

至誠未有不動。是要事事誠。念念誠。人人誠。纔謂之至。纔能動物。若只此一事一念一人上。真實篤至。物不動時。便疑至誠有行不得處。不惟枉物。却枉了誠矣。

凡言語舉動。太盡情。則易失實。

謝約齋曰。集中言語太盡情處亦多。工夫須向裏一步。則言語自有渾涵氣象矣。

心不足者。以學補之。學不足者。以心補之。二者如環。

無端自有相生之妙

人於習氣過失最重處一言一動便須立定成心等待他來有如病人防死臨陣防箭亂世防賊一般

彭躬菴曰王文成謂持志如心瘡防過如猫等鼠
與此同妙

讀書聽言當自省者四不虛心便如以水沃石一毫進入不得不開悟便如膠柱鼓瑟一毫轉動不得不得體認便如電光照物一毫把捉不得不躬行便如水行得車陸行得舟一毫受用不得

丘而康曰四者不可闕一且今自省者有次第可
循妙妙

有過不令人知是大惡事。然有過輒自表白又未免。
因不諱過三字把改過工夫鬆了一分。

彭躬卷日有以不諱過諱過有以極不諛爲諛惟無私乃能別白

無人處易肆。有人處易僞。舉步動念犯此。

謝約齋曰惟其無人處肆所以有人處僞故工夫必以不媿屋漏爲根本

人性質偏處在擇友取益以濟之。然濟了豈便中和。
亦只成就得我一端好處。若不求相濟并一端好俱。
成不得。

讀書聞過當如病人求醫有得之則生不得則歿之。

意不可如試官評文取其瑜者棄其瑕者而已
有惡無善者是禽獸無善無惡者是草木人生平無
大過惡便怡然自足不思爲善焉能爲有焉能爲亡
此與草木何異

丘而康日不思爲善在草木則可在人卽是大過
惡况草木亦各有天然之善以益於人

余生平交友做事皆要揀有益處然往往失人悞事
蓋分別太過算計太精止知以有益爲有益而不知
以無益爲有益且立志要有益是先有急迫爲利之
意卽此便已不裕以應事物乖衆招尤無惑也

石公曰每讀諸東牘可謂小心翼翼矣然冰叔生平反構一二大難幾幾有殺身喪家之虞者此又何故而平常之人率意以行未嘗有慮禍防微之心反與人無怨尤終身夢寐俱安則又何也此中學問大須自反夫子曰慎言其餘則寡尤慎行其餘則寡悔然則冰叔不免有尤悔者必其繁於言而勇於行故也夫言行之間豈必無德者乃致尤悔卽仁言聖行我微有自多於人之意而尤悔自來矣若冰叔之尤悔又自不同每與人有身家性命之仇怨從此不自殛晦吾恐將來尚有意外也大抵冰叔之文之行皆如水晶射日又如新劔出冶光芒刺人而鋒鏑淬手此其所以來尤怨若能痛自斂抑亦可不必小心翼翼而自安矣夫處權勢而來弋與處名行而來毀其道一也此老子所以尚退也○此石公評于丁亥諸手柬也以其言切於藥石故附誌於此

我不識何等爲君子但看日間每事肯吃虧的便是

我亦不識何等爲小人。但看日間每事好便宜。便是。

要真實。保身家人。便已近君子一路。

凡刑殺之事。仁者見之愈生其仁。忍者見之愈生其忍。故君子遠庖廚。亦恐有習慣成自然意在。

每見窮鄉愚人。倡優下賤。不由學習教訓。常有至性。勃發超古絕今。卽本人亦不自知其所以然。只不如。此。腰過不得。可見天地生機觸處湧出。正如石壓竹根。竹筍橫生。又如芝草靈泉。原不擇地。仔細體認。胸。

中有無限活潑生動之趣。

知己二字是豪傑最傷心處。然最能誤有血性無學問之人。蓋認理不明則譽我者以爲申於知己。毀我者以爲屈於不知己。漸而順我者親。逆我者疎。甚而以諛詞爲德。以直諫爲仇矣。可不慎哉。

余授徒水莊。不勒爲教條者。三曰人之所不能曰事之所難行。曰己之所未嘗爲者。

真好名者必不好勝。真好勝者必不惡人攻其短。必不事事求勝於人。

季子曰此特爲好名者又好勝又惡人攻短又事
事求勝者言耳就其好而正之易爲力矣與之爲
無涯達之入於無疵錄中向偏處說皆此意語云
三代以下惟恐不好名好名則尚顧名義在

凡做好人自大賢以下皆帶兩分愚字至於忠臣孝
子貞女義士尤非乖巧人做得蓋至情之人一往獨
到故私意世情不能入其胸中予嘗論朋友知己若
無些愚意在終到不得十分至處

謂門人曰古云父母以非理殺子子不當怨蓋我本
無身因父母而後有殺之不過與未生一樣古人看
得兄弟極重差父母不遠蓋如兄弟三人損失一個

則天地之內止有兩個任他萬國九州若億若兆人再尋一個來湊不得聖賢言語俱是實理實情不可作教訓世人過淡一步話看又曰先儒謂弑逆之人只因見父母有不是處蓋小不平則小計較大不平則大計較積漸所至勢固然也然則人子日用尋常之事有與父母計較短長之心便已陰在弑逆路上著脚矣可不畏哉又曰每見世俗有疎同父異母之兄弟而親同母異父者可謂大惑同父異母兄弟譬如以一樣菜種分種東西園中發生起來雖有東西

之隔。豈得謂之兩樣。某同母異父者。則以兩樣某種
共種一團發生起來。雖是同處。豈得謂之一樣。某
聽言聞過。只取其長。益於我。不可有高下賢愚分別
之念。尤不可計較進言者品行。何如。若有教我以正
未出於正之想。不但阻塞言路。便當面錯過。幾許明
鏡良藥矣。

爲諸生講弟子入則孝。書因謂吾輩讀書一世。便讀
此節不完。蓋孝弟謹信愛衆親仁學文。每事能到極
處。卽聖人不過此。然使不依此做去。便成了不孝不

弟行事放蕩言語虛花待人殘刻樂交邪友目不親詩書之人卽是一個活禽獸了當三省于斯言

巍巍乎舜禹有天下而不與是何等胸次常常念此極器小人胸中自能生濶大行一不義殺一不辜而得天下不爲也是何等脚跟常常念此極苟且人胸中自能生緊嚴

彭躬菴曰惟能不爲所以能不與

五倫於今惟兄弟最薄固是天性不明亦由後世兄弟之禮不講拜揖坐立毫無尊卑其平日習見習行

皆以爲吾本等夷之人故弟可以與兄相詬諍相搏擊相訐訟。今宜正其禮。平日相見弟南立北向奉揖。兄東立西向答之。如元旦大壽等禮。第四拜兄立受。二拜答其二。平日奉兄既謹尊卑之分久定。則雖有睚眦。兄縱可以凌弟。弟不得以抗兄。且使家人見吾尊兄如此。而弟婦亦不敢與嫂抗行矣。孔子言君子道四以事兄。並于事君。事父。古人云君父兄之尊坐于上。臣子弟之卑拜于下。可以知禮矣。○按此惟同父兄弟禮當如此。諸從兄弟如常俗可也。

令諸生自陳功過批論之示某曰夫立身有本治家有基不於本與基致力則如浮萍漂泊永無定止又交遊泛濫不求真君子可依倚者一當患難貧困則生平之力皆虛用舉目茫然無一可緩急矣自反於實無悔而思吾言示某曰詞色間忤父母有任性情故爲此不孝之大者有氣質偏駁欲改不能者然天下斷無不能改之氣質無事時淡自悔責屈柔其氣調習其容臨事時凝心聚神以察其失頑性將發十分強忍忍之既久則成自然子試以吾言用工一月

不驗不足信也。示某曰。啖過須用。倒倉法。將病痛大頭腦上。極力掀翻。然後逐節整頓。所謂大頭腦者。是君子小人分別之關。看得清楚。斬然斷絕。所謂君子小人之關者。又只於舉念行事時。細察此是正。否邪。否是光明。否曖昧。否是直遂。否諂譎。否是公平。否險刻。否則較然得其大節矣。示某曰。父母不在。亦有可盡孝者。記曰。父母沒。當爲善。思貽父母令名。必果爲不善。思貽父母羞辱。必不果。此其大節也。至於意中常思慕音容。不忘其形。祭祀必敬。春秋省墓。無闕。兄

弟姊妹舅甥以情厚之。此皆所以致孝於父母者。示
某曰。欲爲善而不能發揚。此必有故。自後每遇善事。
便想我此事爲何做不出。或是才短力弱。便與師友
商議此事。當如何經畫。便行得。或是胸中懶惰。及有
私意牽制。亦與師友商議。我有一念做此事。却又有一
念不做。師友畢竟爲我扶起好念。判去歪念。久之
見得到。便做得到矣。不但可以進德。亦可以造才也。
與人子弟交。能使其祖父悅之。定是良友。爲人子弟
能與祖父之友爲友。定是佳子弟。

善利已者不損人善報仇者必種德

彭躬菴日莫徒作老世事看

疑生妄。妄生真。真生信。信生疑。善疑者必有所以實之。是故終身沈沒而不活。

能識時務。方許談天下事。既寡尤悔。乃敢論古之人。知人者必盡知其長短。然後可以用人。可以成人。可以論人。用人者取其所長。則其短無害也。成人者攻其所短。則其長無弊也。論人者長短不相蓋。或於長中見短。或於短中見長。

用人寧使其用有餘於體交友寧使其體有餘於用
故用人者或貪詐可使交友者必忠信爲先
我爲客則以義讓主我爲主則以禮讓客此無爭之
道也推之飲食器用無不當然

人稱有度量當別其義度者度也尺寸井然不亂量
者量也升斗泯然無跡兼此兩者乃成大器

少年子弟聰俊者當教其腳踏實地敦樸者當引其
心向空處或問何謂空處曰無是事作是事想不當
境作當境想當懷古人遠憶名山大川之類是也蓋

敦樸者資性當滯於有每見現前守成規少高朗濶
大之意故須引向空處發其大機揚其志氣乃有入
路釋氏所云因諸渴仰發明虛想想積不休能生勝
氣亦此意也

余壬寅癸卯出遊吳越或病其涉世小拘曰居山須
鍊得出門人情出遊須畱得還山面目

以布施作功德者齋僧不如濟貧濟貧不如建橋脩
路設渡施茶諸普濟事行普濟事不如不妄取人財
放生不如持齋持齋不如戒殺戒殺不如不行害人

事

美食不如美衣。美衣不如美室。美室不如贈人。贈交遊聲華之人。不如贈親戚。故舊贈親戚。故舊不如濟疾苦。顛連者。濟疾苦。顛連者不如奉親。

施塚不如施棺。施棺不如施藥。施藥不如周濟。教導使其不饑寒。暑溼。以至於病。大抵先事之功。無形人不見其可感。故人鮮爲之。是故施恩者不必冀可見之功。受恩者必當思不見之德。

丘邦士曰。以感言之。則宜施之生人矣。只爲名目上。覺得善。敏人是大功德。醫養人者。難於繼。則功

不專歸一人故人。不爲耳。此一種評較名心利心。
功心俱有在內。故當以叔子之言爲針砭也。
雞鳴不寐。自念出遊以來。未嘗有所求乞。而沾沾懷
于澤之情。未嘗見一要人。謁一名士。而汲汲有務名
之心。名利之際。可易言哉。癸卯舟中書。

已所有者。可以望人。而不敢責人也。已所無者。可以
規人。而不敢怒人也。故恕者。推己以及人。不執己以
量人。

人每自言我能虛心。我能容人者。未之思也。我之才
地學問。事事過人。而能屈己以從之。乃謂之虛。否則

狂而已矣。橫逆之來自反。無一毫不是。而不與之較。乃謂之容。否則妄而已矣。

公子荊苟合。苟美苟完。此平時語也。諸葛武侯苟全性命。此亂時語也。只一苟字。有道無道。受用不盡。殺人取貨。弑父與君。只是有我之私。到極處而已。彭中叔曰。無我之極。至於爲聖人而有餘。有我之極。至於爲盜賊而不足。

門人任安世問曰。先生諍人人。每悅服。必有其道。可得聞乎。曰。進言之道有三。而當機之用不與焉。一曰。

立信。一曰致誠。一曰任怨。吾平日所言所行必勉去
好利。好勝。護黨。護過之習。然後論一事責一人。人皆
確然無疑。我之意而後言可出也。子夏曰信而後諫
是也。吾平日足取信於人矣。及其將諫人也。羣居獨
處。飲食寢興之間。視君友之過。若痼瘕在身。而必思
去愛之。若白圭。惟恐有瑕。所謂賣直聲立風節。逞意
氣之見。纖毫。不至於胸中。而又左研右鑽。若不得其
從入之路。如道家之鍊神朝元。釋家之叅究話頭。而
後言可入也。孔子曰忠焉能勿諄乎。能勿云者。至足

於中而迫溢於外如春氣鬱盎而源泉怒發也吾信
矣誠矣我所不能者不敢以責人人所必不能者不
敢以強人視其力之可進推其心之可原使聞吾言
者惕然生其慙懼而洒然自得而後言可行也故曰
無諸已而後非諸人又曰王道本乎人情又曰觀過
知仁則皆所謂恕也三者既得然後求進言之方或
先或後或隱或顯或直或婉要於當機而已此其說
莫備於余所評孟子牽牛章及書老泉諫論後凡四
者皆余所願學未能且以質之同志者

陶淵明云聞多素心人樂與數晨夕夫人必無利心
無名心無好勝心無私曲心無隱匿心而後謂之素
心有一於此可易言哉今徒以無鱗甲者當之淺矣
彭躬卷曰淵明求素心人未必盡如此特如此論
素心自佳

予少稟慤直多效忠告於人而頗自好其文凡書牘
必錄於稿吾友彭躬菴曰人有聽言而過已改者子
文幸傳於世則其過與之俱傳子不忍沒一篇好文
字而忍令朋友已改之過千載常新乎予媿服汗下
此語與古人焚諫草更自不同

或問子於世間最敬何等人曰敬真道學甚於敬忠臣孝子最惡何等人曰惡假道學甚於惡亂臣賊子或曰忠孝非道學而何曰真道學未有不忠孝者真忠孝有不道學者嗜欲之私名利之習未除也或曰假道學何以甚於亂臣賊子曰亂臣賊子遺臭萬年人人知而惡之假道學則言清行濁竊取高名欺天罔人壞亂天下心術其使人憤恨當更甚耳

揮孫菴曰此論最有關於學術要在道學二字辨明則假道學自無所容其惑亂矣何謂道學堯舜以來轉相傳授之心法是也推其實則曰本諸身

其極則曰

見天則舜之孝文王之忠則即忠孝

無私欲忘名利則亦循之忠孝豈可遂許之見天
則不見天則而無私欲忘名利賢知之見仁知者
也不見天則而忠孝百姓之日用而不知者也皆
不足語於道學若夫假道學則沒身名利私欲中
正道學之一蠹祇因世無真道學故爲所欺耳

余嘗舉古人願天常生好人願人常行好事二語謂
足蔽四書五經廿一史諸子百家中好話頭或謂欲
約言之只上六字已足曰不然好人亦有各路畢竟
以有功德於世肯利濟人者爲上須知上六字是勸
世中爲惡小人有無可奈何之意而視之於天下六
字是勸世中獨善君子有無限丁寧之意故視之於

人。

與丘而康論文簡勁明切作家之文也波瀾激蕩才
士之文也迂徐敦厚儒者之文也爲儒者之文當先
去其七弊可渙厚不可晦重可詳復不可煩碎可寬
博不可泛衍可正大不可方板可和柔不可靡弱可
無驚人之論不可重襲古聖賢唾餘其旨可原本先
聖先儒不可每一開口輒以聖人大儒爲開場話頭
七弊去而七美全斯可以語儒者之文也

家政當寬平整飾故事不亂而人不怨亦不能欺也。

人有與我竊言左右親暱之事者不但不可漏言卽須督責訓誨亦當特加曲折以泯其進言之跡不使受責者意而知爲何人蓋可意而知必相怨恨報復負忠告之厚心而忠臣直友亦相觀爲戒而緘口矣至於或稱公議以折之或援有德望素所信服者之言以臨之又當別論

聽言者不肯從人固爲自是進言者每事責人從已自是不尤甚乎且其弊將使人遠正直之士杜忠諫之門蓋可從可違雖非甚虛心之人亦願姑聽而擇

焉若從之則喜違之則怒人將惟恐有進言於其側者懼言而不從必取尤怨不如早遠其人豫杜其口使不及言而已矣欲效忠告者不可不知也

每愛韓退之紀夢詩乃知仙人未賢聖護短馮愚微我敬只因微人敬一念白招得未賢聖三字要人敬處反生出不敬矣凡人立身但自盡其可敬之本至人所以待我無庸心焉若有要人敬我一念以名勝爲根必生出機術爲枝葉在已旣傷心體而聰明血性人稍一窺見便掉臂思去矣

正是愚短權術。正是馮獲妙於疏白。○名勝

人於習氣偏僻處。若少時不加學問。到老越無把柄。閒時不加學問。到患難疾病。越無把柄。貧賤時不加學問。到得志。越無把柄。生時不加學問。到臨死。越無把柄。平時受病。一分要緊處。便長出十分矣。師友講求之益。不可一日忘也。

正人中有以技術談諧爲經世之事者。機圖力敏。最足輔正義。所不及然。必須不失靜重之氣。方令人不生輕薄。於以感人。當亦有更渙處。

謂門人曰只一誠字一謙字自處處人終身受用不盡然此二字最爲老生常談須閱歷之久身經踉蹌方覺是處身涉世祕訣如獲異聞也。

凡大器大用之人未有不淡沉靜重者卽或英風豪氣一往不可遏決不犯輕浮淺露四字

謂門人曰最忌於衆中稱說已長及述他人如何贊譽於已偶或引及詞色愈要謙謹若稍爾飛揚跡涉誇誕便令旁觀不雅卽稱祖父功德亦須與稱述他人不同予蓋折肱而未已者言之有淡悔也

授徒新城作館教條件其引曰古師弟子大義僕既與諸生詳言之矣諸生宜鼓礪拔起以自遠於世俗僕不自揣量竊謂南面而爲人師固非徒教以進取之器又非徒以文章名當世而已將使立身經世之道皆於此舉之諸生其自束身以聽吾約不聽約者小則譴呵大則鞭扑不敢違已徇俗取悅子弟負賢父兄擇師至意爲名教罪人也其一曰立志古今天地內止有此身安肯碌碌甘爲人下溫飽安逸畢世而已上者忠孝信義爲俊傑奇偉之人次亦謹言慎

行不失鄉里長者至於文章首當明理鍊識爲有用之學徐攻格調爭衡古人也其二曰肅規規凡六其三日勤課每日課分四時夜記於冊每朔望黎明盥櫛行禮總巡半月課誦講說古今嘉言善行察治在館在家行事得失其四曰廣益諸生毋蓄疑而不問於師毋恥不能不問同輩勤學虛心自然事事有得卽僕謬長一日自知闕失多端其過言過行及講論差謬處諸生見及有能直指其非者僕謹虛已聽受敬而愛之親於子弟矣

讀書入書好附和好翻駁皆病也能以敬畏古人之
心而披其疵則幾矣

評甘健齋與彭躬菴書曰霸功救世世間自有此種
人蓋志欲救世而學問力量不及大聖賢則應變濟
艱自不得不參以智數刑名若又步趨王道則其事
不可成非王道不可成事而此學問力量未及聖賢
之王道不可成事也故有知其如是能爲而爲之者
大聖賢也知其如是不能爲而雜用旁通以爲之者
真豪傑也知其必如是而後爲不如是而不爲者學

聖賢而能自守者也。知其如是，不能爲而反仁背義，必爲之後已者，學豪傑而滅裂陰賊者也。譬如買物，理須紋銀。聖賢則純用紋銀者，豪傑紋銀不足以呈色。參之學聖賢者，紋銀不足，又不肯用呈色，則寧棄物不買。學豪傑而滅裂陰賊者，則有紋銀亦必寫爲呈色。無呈色，并用假銀矣。然此又須辨所買何物。若爲父母醫藥，則紋銀不足，參以呈色，未爲不可。若以市酒肉綺羅，是不可以已乎？愚嘗謂術非聖人得已，專意利人，不得已而用謂之聖賢。專意利己，可不必

用而用謂之奸雄。上等人世所間出。中二等惟人自處。下等則必不可耳。持世垂教有躬菴之說。不妨更有健齋之辨。古人所謂互相食者。蓋如此。又曰。功利傷教。害義者。當闢。功利有益於名義者。不當闢。如秦楚當闢。齊晉不當闢。此孔子所以予桓文。仁管仲也。近有學者尊說程朱。而鄙良平。蕭曹以爲附耳。躡足之流。不足道。夫平誠可鄙。良不可及也。卽如蕭曹一輩。雖聖賢之學全未之聞。然擇主而事。救民水火。其功利足以濟一世之人命。而亦未嘗壞後世之人心。

此吾所汲汲求之而不可得者而顧可薄哉

乙巳三月初九日黎明醒而復寐夢有言能以禮讓
爲國題者一人曰讓亦極難余應曰但思己之才智
不可恃人之才智勝於我則自然讓矣

中庸曰去讒遠色論語曰遠佞人讒佞同類一曰去
一曰遠何也蓋讒主於害人佞主於悅人佞人在側
稱功頌德軟美足喜其可好同於女色故曰遠也然
則吾知其爲佞矣又無害人之罪雖不遠何傷夫佞
人之言多似是而非道欲文過最足自便吾卽真知

其。候。而。厭。之。常。在。左。右。必。有。不。覺。入。其。彀。者。譬。如。好。色。傷。生。人。所。本。明。使。日。近。美。色。雖。自。警。以。生。死。大。故。終。不。能。持。故。佞。人。必。遠。而。後。可。然。讒。人。不。佞。必。不。能。讒。而。佞。人。苟。欲。媚。人。雖。害。人。不。顧。是。佞。者。讒。之。源。所。由。工。讒。者。佞。之。流。所。必。至。也。嘗。論。益。者。三。友。諒。之。益。重。於。多。聞。直。重。於。諒。人。當。頭。能。友。直。則。諒。與。多。聞。如。破。竹。之。易。損。友。中。善。柔。之。損。輕。於。便。佞。便。僻。輕。於。善。柔。有。志。之。士。孰。肯。立。心。友。便。佞。者。只。嫻。於。威。儀。容。止。也。人。雖。少。誠。實。亦。自。可。好。友。之。亦。無。害。不。知。此。處。不。

謹愈趨愈下必漸而友善柔又漸友便佞矣故聖人
教人益友先其最重者損友先其最輕者友益先勉
其所難友損先防其所易此去讒必於遠佞與或曰
易稱包荒書言容德下至曹參王導亦以容忍優容
成功名於時何也曰佞人之才亦有可用或任一事
或處散僚豈能盡絕但必不可令在左右阻正直之
路而開嬖倖之門也久歷世故身經跌踣愈覺聖賢
言語親切有用特一拈出與同志共勉詩曰靖共爾
位好是正直神之聽之介爾景福夫正直有福人亦

慎無爲讒佞以自絕於君子哉

謂任安世曰義氣二字須分得等級明白如聶政受嚴遂之知身爲之歾而不洩亦算得義士然殺身爲人報私怨以視荆軻則非義矣荆軻逞匹夫之勇卒以殺太子而亡燕視張子房博浪之椎則非義矣子房縱敗不過殺身耳然子房以王佐之才不思求真主救生民冒歾以逞其一擊視子房他日輔沛公滅秦彘項則猶非義矣

余性不信人道人惡事又多爲人隱藏過失然被人

估算得定。拏捉得住。便會落其局中。此間不可不自尋出路。朋友愛我者。箴我姑息。謂當進以剛斷。造爲忍人。此語似偏。而實確。彭躬菴日子每云。處大事。便不如此。夫小事不謹。必至因循流漸。而誤大事。誠至言也。

彭躬菴曰。姑息。絕似厚道。其實相遠。厚道是明明曉得。只不說破。絕不爲人估算。拏捉。

門人任安世曰。成天下之大功者。官天。之大福。官天下之大福者。必其器量足以受之。今觀先生文字。議論得意處。輒喜不自勝。恐非受大福之器。叔子嘿。

然良久曰此宿疾也久不親嚴師畏友又復妄發矣
○予近以左傳授門人任安世賴韋吳正名日久講
論三子多所啟發規益而任生尤敢言偶錄其切者
如此乙巳七月初十日新城記

學有真偽從來不免嘗嘆昔之偽者將他人平生得
力處說向自己可謂顏厚不慙今之偽者將自己骨
髓受病處痛罵他人可謂良心盡喪夫既知此爲骨
髓之病而不肯醫矣又視爲他人之病不認己病又
痛罵他人之病以自表其無病又懇懇然觀貌切脉

制方和藥以醫他人之病。嗚呼此人雖有雷公岐伯
復生亦且奈之何哉。

與季弟論用財至親骨肉及一體朋友處不敢施鄙
吝并不敢施慷慨却莫作稱物平施道理看。

季弟曰不敢施慷慨一語令人心痛我欲淚下三
升矣。

與常人共財當自損以讓人與賢人共財均平而已。
此方是忠厚盡處。

彭躬菴曰此語却令人心驚○似翻管鮑一案其
實多自與亦是均平。

新城縣有劉楊子居京師中同鄉人見其資用豐饒

問汝有何術。輒能榜人。答曰。一味誠實。予聞而擊節。曰。此語入神。昔陽明先生問淵頭賊首謝志。柵曰。汝何以能聚衆。曰。吾遇一好漢。必不放過。極奉其所欲。而結之。先生顧謂門人曰。吾輩於朋友如此。何事不可爲。使先生聞劉楞子語。更不知如何傾倒矣。人能參透一部西遊記。便知他此語著落處。

伯兄曰。貪賈三之。廉賈五之。

凡兄弟叔姪甥舅之屬。年及十歲。便當別其臥處。蓋童稚無知。偏則易爭。狎則不敬。此中有多少保全處。

宋人逐猘狗而華氏出奔何文淵訛聞陳都御史至而自縊讀書至此未有不啞然失笑者陳廣州刺史歐陽紇反士人流寓者皆惶駭前著作佐郎蕭引獨恬然曰管幼安袁曜卿亦但安坐耳君子直已以行義何憂懼乎紇平陳武帝徵爲侍郎鄙諺曰爲人不作虧心事半夜敲門也不驚真格言也

蘇子由曰天子於天下非如婦人孺子之愛其所有得天下而謹守之不忍以分於人此匹夫所謂智而不知其無成者未始不自不分始然此亦匹夫之愚

者耳石崇被收嘆曰奴輩利吾財耳收者曰知財爲禍何不早散之崇不能答齊神武見天下將亂散家財以結客而呂頤一婦人知呂氏禍作出珠玉寶器散堂下曰毋爲他人守也近有巨宦聞寇偪裝金銀數十百擯置庭中夫役皆逃獨與其妻列炬照諸箱篋痛哭守之兩目盡腫及天明而寇至就執凌遲以歿矣記曰積而能散此蓋智於守財者也

君子得小人之術則不可制小人得君子之道亦不可制放人者甚不可不使君子知小人之術而慎無

使小人通君子之道也

丘邦士曰得意在使無使處

責備賢者須全得愛惜裁成之意若於君子身上一
味吹毛求疵則爲小人者反極便宜而世且以賢者
爲戒矣若當君子道消之時尤宜深恕曲成以養孤
陽之氣今世所謂責備賢者吾惑焉

彭中叔曰處賢者當如是賢者自處不當如是若
出於愛惜裁成卽吹毛求疵亦不妨自不同於嫉
忌翹過者

謂門人曰文章不朽全在道理上說得正見得大方

是世間不可少之文。余覽古今文集。若一連三四篇中。不見一緊要關係語。便知此人只在文士窠臼中作生活者。然要揀正大道理說。又有二病。一是古聖賢通同好語。掇拾敷衍。令人一見生厭。惟恐不完。一是真正切要。好語。却與吾生平爲人。南轅北向。了不相涉。卽不必言清行濁。立意欺世盜名。亦未免爲識者鄙笑矣。

林確齋曰。今人汗下。凡文人著書者。不可不置一通卷首。細細討論。痛自反求。方免得厭笑二字。

與季弟論兄弟朋友如何方是至處。設或一事誤我。

性命。歿而不怨。一事救我性命。生亦不感。辟之自己。失脚墮水。被人救活。雖自悔不謹。却決無怨。薄自己之意。與未墮水之前。只是一樣。有人推我下水。自己極力扒得登岸。雖自幸再生。却決無感激自己之意。與未救活之前。只是一樣。如此乃真謂一體。方是兄弟朋友到第一至處也。

惺遜菴曰。罕辟至此。亦不可言矣。若一體意看到。剋髓處。方知此辟亦只尋常。

季弟曰。只是兄弟朋友先已到至處。後來再加減不得耳。如登泰山。已到絕頂。任你會行。只在山前山後。安得增一更高。去處來增不得。便減不得。歿而不怨。猶可言也。生亦不感。不可言矣。

與伯兄論朋友既識得此人真是君子一路與之定
交無論不可以嫌疑小節遽生疎薄卽令行已有真
不是處待我有真非理處亦止當責其一事而惜其
生平辟如脚上忽患惡瘡但當醫瘡不當嫌脚蓋世
道愈下君子愈少吾輩當如貧家惜財不得不愛護
保全也至於初昧知人或末路改轍則毒蛇螫指壯
夫解腕又自有義矣

謝約齋曰預先一著尤在時時互相提醒事事互
相匡救不令有瑕隙至纔是愛護保全之道若不
幸而至螫指解腕未必便是初昧知人或者中路
悠忽放過以至於此則自己亦當認罪一半交道

中念及此傷心之事敢不各自畏慎裕齋苦心神明共鑒吾輩其銘刻之

評涂空振高歡論曰天下大節奇功決非尋行數墨人所能辨然奇士舉動議論不獨驚心駭目實有一種大言囂氣輕浮陰躁之徒自負奇士觸手輒敗所以每爲老成所棄而真奇士之宛結憤鬱不得發舒勢必如石壓竹橫風起波立矣故好假奇士者其弊每至禍身而能收真奇士者不特可爲國家效用亦可爲天下造福也

彭躬菴曰別白真假不必言矣然亦有奇而偏者如張元吳昊之類全要收拾吾每讀陳同父中興

道集錄未嘗不撫心浩嘆於龍伯可宋南宮諸人也

李弟曰爲天下造福一語大而精收拾奇士消弭禍亂不獨君相有權位者之責匹夫有志在在可爲吾兄題水許云君不擇臣相不下士士不求友乃在於此真微言偉論人何可無此一副心胸在往授徒水莊易堂諸子嘗相過從余謂諸生曰此磨鏡匠也諸生愕然余曰先生如鏡子諸生各來取照然積久塵昏鏡子自體不明若不得人磨洗安能照人伊川先生言人有三不幸余謂當以學業粗成爲人經師爲四不幸何也門人從學者必皆才智行履不如先生於是言莫子遠漸成堂上一呼階下百諾

之勢他人亦以其既爲人師奉以虛體每事多說向好處久之先生自以爲是不思聞過亦無有以過告之者余念家食日艱三十授徒積今十餘年使不得勝已之友時相規益不知塵昏何等矣近諸生有轉相教授者爲道往事如此

謂門人曰人無智術不可濟世全身然最易墮入邪僻反以殺身毒世者故有智術人不但不可用於不正凡小處閒處俱不可用蓋每事算計逞聰明求勝者卽此便犯天人之忌且物數用則易敝今如干將

魏叔子文集

錄

卷之一

裏言

章

莫邪。聞時用以殺狗割雞。必至鋒銳消滅。他日屠龍刺虎。反不堪用。予嘗謂智術二字。必須無魏忠厚光明四字。然難言矣。

與諸生論讒諂面諛四字。面諛者。稱譽順從而已。諂則加甚焉。卑污曲媚。無廉恥矣。讒則又甚焉。亂是非。排忠良。害人誤國矣。然其端皆自面諛始。人只一好人。順已流弊。便無所不至。其在已身也。初好面諛。久之。性習驕恣。好諂矣。又久之。蒙蔽昏昧。好讒矣。其在衆人也。初面諛者。得售聞風。而諂者來矣。諂者得售。

聞風而讒者來矣。其在一人也。初投我以面諛。我安其諛。而彼更進。其諂矣。我安其諂。而彼更進。其讒矣。此皆人已必至之勢。故君子慎其端焉。或問何以不言面諛。諂。曰。讒諂面諛。其猶恆言天下國家之義乎。

與諸生論不挾兄弟而友。可見兄弟不但天倫樂事。亦是勢利妙物。竟與貴賢一般。可挾。阿柴折箭之喻。最爲明確。詩曰。樂只君子。民之父母。子夏曰。四海之內。皆兄弟也。君臣父子兄弟朋友各擅一倫。却天子。

至尊尚褒以父母之名朋友亦義必進以兄弟之號
可見五倫中又是父母兄弟最妙人乃薄其親而仇
其兄弟何邪

家伯子客燕都時有按察使要之入幕堅不肯往謂
所知曰刑名之事吾未素學此人命所繫豈可以驟
習倖中而苟高其利乎又嘗語禘曰吾見士君子好
用聰明如醫藥地理之類技非專家偶一涉獵便謂
得其要領精出庸衆輒持此試人養身者吾未知其
可也此等可謂極有本心之論

謂門人曰世上無有不宜讀書之人賢者固益其賢
下愚讀之縱不能益決不至損或謂人有讀破萬卷
不辨一事者此讀書無用處也余謂此人脫令不讀
書遂能辦事否然有兩種人却不可讀書一種機巧
之人原有小慧又參以古人智術則機械變詐百出
不窮不至害人殺身斷不罷手一種剛愎之人既自
以爲是加之學問充足則驕滿之心漫天塞地必至
一言不受一非不改卽不殺身亦成絕物終身無長
進日子矣

魏叔子文集

卷之十

七

人所以媚疾者不過惡人出已上欲天下功名皆歸已身耳昔有以不能文章病韓魏公者公曰琦爲相歐陽永叔爲學士天下文章孰大於是余嘗笑謂永叔一生苦心勞力做成如許文章却只如替魏公作了也休容之極竟與媚疾同功人亦何樂乎不休容何苦而媚疾哉

古今以婦人釀成父子兄弟婚友鄉鄰之變者不一而足總以婦人之性專一自是非人其言偏屬有情有理聽言者又每是已婦而非人婦雖賢智亦陰移

而不覺故不聽婦言自是難事然試一平心推勘婦人與人爭詬百十次中只有怨人責人曾有一次肯說自己不是向人謝過否然則世上婦人盡是無過聖人也平勘到此其言自有不可聽處且不必細細推論一事一語曲直所在

謂子弟曰人好氣爭勝者於不平之事遇勝已者則曰勢地不如我是我大量容他今彼可以凌我而讓之是畏懦也如何不爭遇平輩則曰汝與我一樣人而顧欲加我乎如何不爭及遇不如已者則曰汝事

事不如我乃敢欺我况他人乎如何不爭然則終身
皆與人動氣之日了無退讓休閒矣此皆女子小人
見識故凡拂逆之來先以情理平論情理在我又退
一步則自然相安士君子最不可有女子小人見識
在胸也

又曰人好諛惡直者明責之則以爲面辱隱諷之則
以爲譏刺不中實則以妄言激怒中實則以切骨啣
恨先事而言不曰迂濶則曰預以小人度已事後而
言不曰無益則曰倖敗以恥我實見諫者有許多無

道理處只是終身不容人開口而已。可謂有言逆心。必求諸非道者也。

世風日薄。施恩固難。其人卽報恩之人不可得矣。豈惟報恩難得。卽求一感恩之人不可得。更求一知恩之人亦不可得。此世所以愈無施恩之人。然施恩者須算定。知恩無人。只認是自己應做事。向前做去。方不退息。善念。

世上有一種行濁言清之人。有一種言清行濁之人。行濁言清者。行愈濁。言愈清。以文其惡。是立意自欺。

聽人之小人也。言清行濁者初然高興言之不揣及其行事背馳不顧此則號爲君子者亦不免矣。然不均謂之假道學不可得也。

謂門人孔之達曰處一事一物之智有君子與小人毫無異。而細論其心亦是一樣處。然學者必須見得大源。流君子之智畢竟從大體明通中出來。小人之智畢竟從大體狡詐中出來。故小人之智令他再推擴一步便與此事若黑白之不類矣。嘗謂後人看得聖賢行事事與常人不同。是奉承聖賢太過自用。

意見失却聖賢本色。若看得聖賢此事便與常人此事一樣。又是自家心粗學問無得昧却聖賢本領兩者之間須索細心理會也。

己酉九月初四夜夢與伯兄論文達旦醒而錄其記憶者予云聰明人最有好議論然不如老成閱歷之人議論更精說得便行得也。嘗聽閱歷人極平常語細思之字字穩當有淡味。或於他日他事乃悟其言之妙。伯兄云古人一字不輕下一語有幾層曲折四面玲瓏。又夢語賴韋世傑云人道我近日文十有八

好然不敢自信試看所言那件真能行得人生學問
何日是住脚時

與甘健齋言今之學者必闢禪以崇儒其實世無真
禪那能害儒欲正人心者但當自謹義利之辨闢禪
非今日急務也又必賤伯以尊王其實世有真伯尚
可輔王欲救生民者但當自審虛實之分賤伯非今
日當務也況此等道理前人言之折毛剝髓毋用更
增多許口舌筆墨耳

天下之至潔者莫如火火能浣釋萬物之穢而不受

其汚。關尹子曰。火神無我。蓋以神用者。則形不累。無我。則物不得加也。

人於文字上。虛心求益。只算得聰明。於行已上。受善改過。方謂虛心。或謂二者俱是要好心。何以分別。曰。要求文字好者。多要求行已好者。少矣。責善於文。辟如人好酒。只飲惡酒。我却以美酒換去。雖奪其舊物。而飲之倍甘。於他好酒。本意實不相悖。故從之也。易責善於行。辟如人好酒。我却陳說酒害。禁他不許復飲。雖養德保身。其利百倍於換美酒之功。却與他好。

酒本意大相拂逆故從之也難或曰今人於文字亦惡人譏彈不肯一字受善何也曰此所謂寶蝨九而棄蘇合只是癡到極處耳

古人云及時爲善又云及時行樂不爲善則失天地生人本意不行樂則勞苦寂莫無有生之趣兩及時俱少不得韓子曰胥靡有免歿罪時活惟不知足者之憂終身不解余每聞人歿輒用自寬也

或問婦人女子一言之忿不難引繩吞藥及遇暴客心知身辱名喪反貪生不能自全其故何也曰歿人

所同畏不畏歾者。全恃氣耳。忿之所激氣。因而強氣。強則輕生。威之所逼氣。因而怯氣。怯則畏歾。故凡恃才者。用多則才竭。恃氣者。歷久則氣衰。卽血性用事者。亦有久而衰竭。馴至變其初心之時。故必明理精義。以學問補之。師友夾持之。然後可以積而日生。用而不窮。久而不敝也。

人有公而不恕。恕而不公者。皆不可以言平。平則無不公。恕公且恕。則平矣。余生平最喜平字。易曰雲行雨施。天下平也。行字最要體會。

諸子世傑世微請曰今欲處身處世無怨惡而有濟
於務其道何由曰曰誠曰謙曰恕曰寬曰敏曰信曰
惠曰公誠則安謙則榮恕則通寬則得衆敏則有功
信則人任焉惠則足以使人公則說吾與人應事夾
一分詐僞便有許多杌隉破綻處誠則內外坦然面
無忤色故曰誠則安自謙則人不忍毀之故曰謙則
榮責人無已只覺步步窒碍許多行不去處故曰恕
則通世傑曰恕惠公矣又須寬何也曰寬者器宇弘
裕規模遠大其量無所不容故不曰得人曰得衆智

愚賢不肖皆在其囊載中衆莫衆于此也世倣口寬
矣公矣恕矣又須惠何也曰小人以享其利爲有德
故邑有力役趨天子之詔不若其趨富民之備也陳
臥子先生曰雖有堯舜無所與于人天下之心必不
歸雖有桀紂無所取于人天下之心必不叛此惠之
不可已也公曰說何也公者人心所同然惠者人情
所獨感故惠于甲不能使乙惠于乙不能使甲公則
在甲而乙說在乙而甲說矣人不信則雖有盟約我
卒踐之人以爲意外之獲信者有是言必有是事以

此始必以此終。平日見諒于天下。故功雖未成。事雖始定。天下仰望倚仗之。如衣裘之必可禦寒。米粟之必可充飢。若以應世。則八者中。謙信惠尤爲樞要。漢以下得失可見矣。

人生說謊最難。須如功臣家。免死牌一世不浪用去。方得。

人有長自矜。便是一短。有短不諱。便是一長。若不諱短。而又能用人之長。則爲通才。矜己長而又如人之長。則爲絕物矣。

人有一病根定發無數枝葉如病在鄙吝便有許多鄙吝事論人者須將他許多鄙吝事只算一件病不然便覺其人隨事是病別有好處亦抹煞矣且人有一大長便是勝生平之短者至于用人則并有大惡不掩小善之時但險毒嫉妬之人縱不得已而用只宜一時一事倘任之重用之久則利一而害百矣

人處財一分定要十厘便是刻與人一事一語定要相報便是刻治罪應十杖定一杖不饒便是刻處親屬道理上定要論曲直便是刻刻者不留有餘之謂

過此則惡矣。○或問親屬如何不論曲直曰若必論曲直便與路人等耳。

文過者掩失匿非此粗跡耳。文過之精有人所未知而自表暴悔艾以文之者。又嘗見有人做一不好事旋做一好事亦有兩種其一實心自悔勉做好事以贖前愆者謂之補過。其一畏人議已勉做好事以飾前非者謂之文過。跡雖同而君子小人之判天壤矣。學者百病可醫只作偽護過二端乃是終身不起之症。或問掩過與護過同乎曰不同掩過者辟如盜物

不承。尚有懼王法畏公議意在。良心未泯也。護過者如慈母之護驕子。唯恐人之傷之。譬如盜物。本是偷竊無恥。却說出許多道理來。既似不算偷竊。又似該得偷竊。不惟無罪。且當有功。將此過加上十層鐵步障矣。此真壞一己之心術。而亂天下之學術者也。

與諸生論學。古人好文字。須防我受病處。因舉荀卿君子各以所好爲禍語。或謂好仁義忠信豈有病乎。曰。好仁易失之懦。好義易失之忍。好禮易失之僞。好智易失之詐。此大學所以先致知六蔽。所以貴好學。

也。曰。吾見好學。亦有蔽者。奈何。曰。古人言。學必兼問。問亦學也。能問。則虛心。受善。徙義。而無蔽矣。故師友之功。與君親並重。

有理之規諫。雖常人可受。無理之橫逆。非君子不能容。然世之君子。往往能受無理之橫逆。而不能容有理之規諫。其何故也。蓋君子自是而好名。無理橫逆。其非在人。其是在我。我能容之。則我之是愈彰。而名益高矣。有理規諫。其非在我。其是在人。我若受之。則我之非益確。而名有損矣。不知有過受諫。便增一美。

疎而不受。反增一惡。欲護名而名愈敗也。陸宣公曰。仲虺之誥成湯。不美其無過。而美其改過。吉甫之頌仲山。不贊其無闕。而贊其補闕。知言哉。

朱文公云。張敬夫常言。平生所見。王荊公書皆如大忙中寫。不知公安得有如許忙事。余因省向見韓公書跡。雖與親戚卑幼。亦皆端謹嚴重。未嘗一筆作行草勢。蓋其胸中安靜詳密。從容和豫。故無纖芥忙意。與荊公之躁擾急迫。正相反也。按此語最妙。於禧尤切中。但忙整不闕。行草有運筆如飛。而實安靜從容。

者

古人云適意爲真樂是最達生自得語也然亦須看
所樂何事不得漫隨性之所好如照烈好結毗稽康
好鍛阮孚好蠟屐可矣李匡遠好聞鞭撻之聲一日
不斷刑則慘然不樂亦可乎譬如嗜食人各有性文
王葛歐曾皙羊棗可矣若好食土炭食爪甲已怪甚
而食瘡痂可乎犬豕食糞穢又豈不自以爲甘故曰
術不可不慎學者隨性之所近又須慎術方得劉向
曰盜賊因貪名並日月而君子不願夫名者人所同

好。豈惡名亦可好耶。桓溫遺臭之言。只是要做皇帝。心急。故將此語作背水陣。自己斷了後路。刻却良心。是以弑甘心。禪讓之恭帝。敢爲千古篡賊。所不爲。如人言好色不怕死。亦只好色甚耳。豈真不怕死哉。除却死。好色再無別患。除却遺臭。弑逆再無別患。此吾深有取于地獄輪迴之說也。或謂調達入地獄。自謂三禪天之樂。無以過。又云。如來入地獄。則我出地獄。若逢此等人。奈何。曰。想調達住地獄時。未經刀剗石磨。火燒。煎諸苦耳。若經諸苦而尚以爲樂世。有此

等惡人便須讓他出一頭地矣

天下事理自然而已。故無言者本也。而以明理立教。記事道情有勃然辭于中。不得不發于言者。故文非不得已。則不必作。知此而文之可作者。日鮮矣。天下事理易簡而已。故辭寡者本也。而情與理有必待反覆曲折而始明者。故應作之文。非不得已。不可長知。此則文之長者。日鮮矣。吾嘗私志于是。然文筆日多。議論日繁。信乎立言之難也。

唐邢若曰直探立言之本可消焚書之厄

凡性情煩瑣刻急猜察者最能驅忠信之人爲欺詐。蓋不相欺詐則人無以容身也。至偶得人欺已事便詫爲奇怪不勝忿怒又自矜明智難欺不知滿前之人平常之事已日日在人欺詐中矣。

性情苛戾者能使骨肉不相親況遠者乎。和平者能使仇家忘其怨況平人乎。節性之道有三一曰自反有過一曰設身處地一曰勉受直言。

謂門人李萱孫曰

咸齋先生之子

吾易堂八人三人卽世五

人皆迫老病或爲旦暮未可知也今欲統繫後輩敦

通家之誼接續前輩交道者實有望于汝東筦九姓之裔十數世如宗族家人吾易堂豈可再世如路人乎憶汝尊嘗語人曰叔子于易堂譬猶桶之有箍子嘗深思其言以自勉勵箍必須寬大于桶又須喫得虧如今箍桶子槌百敲皆在箍上朋友雖擇人而友然人未有無過者未有生平于我無一二事不是者若一一計較則釁隙立開吾友既屬君子其小過可原大過可責而必不可薄不可屑屑較量報施也又曰吾老矣有三不了事一願天下有枝撐世界之人

一願後輩有枝撐易堂子弟一願吾家有枝撐義門子弟然汝輩苟能以枝撐世界爲事則下二節已上齊了當矣

謂子弟曰人處家無數世親戚數世通家人往返周旋自是德衰福薄

人生世上第一要做一好人。次便要做一有用人。然好人無用。一人只算得一個人。有用則一人可抵百千萬人矣。或問如何。有用。人曰。次要乎。曰。好人有用。最是難得。不敢輕望。先且辦一好人。求無害于世。可

矣。

君子知命。不但安命而已。便有許多補救處。

能知足者。天不能貧。能無求者。天不能賤。能外形骸者。天不能病。能不貪生者。天不能死。能隨遇而安者。天不能困。能造就人才者。天不能孤。能以身任天下後世者。天不能絕。

庚申四月臥病南昌感而書此

凡不能儉于己者。必妄取于人。當省而不省者。必至常用而不用。